

La Svizra en il Cussegl da l'Europa

■ (rtr) **Il 6 da matg èsi stà 50 onns dapi che la Svizra è daventada commembra dal Cussegl da l'Europa. Il Cussegl da l'Europa na dastgan ins betg confunder cun il parlament da l'Uniun europeica.** Il Cussegl da l'Europa è in forum da discussiun per promover la pasch, la democrazia ed ils dretgs umans. Ils commembers dal Cussegl da l'Europa vegnan mintgamai delegads dals parlaments da lur stadis.

Sis Grischuns han fatg part ils ultims 50 onns dal Cussegl da l'Europa: Ettore Tenchio, Leon Schlumpf, Toni Cantieni, Ulrich Gadiant, Theo Maissen e Dume-

ni Columberg. L'antierur cusseglier naziunal *Dumeni Columberg* da la pcd è stà en il Cussegl da l'Europa dal 1987 al 1999 ed ha presidià la delegaziun svizra ils onns 1992 e 1993. Quai è stà en in temp da grondas midadas e turbulenzas sin il plaun europeic.

En quella funcziun ha Dumeni Columberg tranter auter gidà da preparar stadis da l'antieriura Uniun sovietica sco la Moldavia u l'Armenia per in process democratic ubain gì in mandat d'intermediatur en il conflict linguistic tranter Flams e Vallons en la Belgia.